

德壯果公年譜

德壯果公年譜卷二十一

次孫花沙納恭纂

嘉慶七年壬戌

七月初五日

公奏言竊

臣

前因蒲添寶與山內兩起賊匪合夥屯聚於

興房交界之鮑家山恃險設卡抵抗當以兵力稍單囑令色爾滾蒲尙佐等持以慎重相機籌勦

臣

分派妥幹兵勇

四出躡踏地勢連日探報鮑家山周圍數百里密箐深林四面懸巖偏橋極多半山之中有平壩十餘里原係古寨百姓蓋房居住開懸山地包穀雜糧極多賊匪從未經過

之區雖有洞寨不甚堅固以致被賊匪攻搶者數處其入
鮑家山大路兩條約長八九十里偏橋全行拆毀馬匹萬
不能前進其有採藥小路盡皆挖斷亦有賊匪防範並稱
該處原有兩股賊匪數百人先已屯踞其上蒲逆賊股勦
殘之後所賸六七百人馬匹皆無又已與之合夥恃衆依
險毫無畏懼等情又據色爾滾等前後來信探得有小果
子園大果子園迷人埫連三埡有採藥僻徑一條均係老
箐荆棘塞道若砍開挖修順山梁過連三埡口下有陡巖
兩層高三四丈不等過此由老林內下行三四里卽達賊
屯之處惟由此進取庶可攻其不備直搗賊巢旋卽移至

大果子園又恐賊匪知覺一面派遊擊會壽帶兵仍在大
路牽綴作爲進剿之勢自十九日起派兵挖修二十二日
始至連三埢口前途尙有三四十里方抵賊巢色爾滾蒲
尙佐馬元張應貴等籌商道路窄小鍋帳不能馱帶必須
安紮後營又恐賊由牛攔頭竄出商令營總珠山遊擊賀
廷印帶兵一百五十名在於牛攔頭扼據多豎旗號虛張
聲勢並傳諭附近洞寨預備槍礮以助軍威色爾滾蒲尙
佐等是日挑帶滿漢步兵一千餘名乘月色步行而進直
至連三埢口前途盡係箐林難行之極有總管富登阿參
將張應貴賞戴花翎守備史定川同守備周志林張萬林

味

批可嘉

帶奮勇兵四百名開道先行及近賊巢三四里有巖砌兩

株

批

可

謂

不

遺

餘

力

道高三四丈令兵勇等各取葛藤爲繩繫於樹上縋繩而

下藤斷跌傷滿漢兵勇數名色爾滾蒲尙佐等陸續下巖

珠批
可憐

時巳午刻富登阿張應貴史定川等已將鮑家山老林內

之山包占據賊匪毫不知覺及兵勇配齊出林蒲尙佐參

將沈洪守備李榮陞帶兵勇由左手前進副將馬元遊擊

虎正林等由右手截勦色爾滾總管富登阿協領德甯阿

防禦扎呼岱遊擊楊登魁都司沈彪帶吉林索倫及綠營

兵勇直前進剿一齊呐喊衝入賊巢賊衆約有一千五六

百人登時紛紛慌亂前逃隨卽痛加殄戮立斃賊二百餘

珠批
好

名生擒何三忠等一百八十一名因賊匪自將各處要路
挖斷偏橋折毀奔潰至此無路前逃撲巖跌下深溝者卽
有二百餘名我兵亦有滾巖者數名至餘匪盡皆四散鑽
林越箐我兵分投跟蹤追剿因林深箐密賊匪擁擠不開
官兵趕前痛勦又共殺賊一百六七十名生擒楊添福等
硃批好
六十三名是晚卽於林中露宿次日各帶兵勇搜獲散藏
零匪彭士明等四十二名計連日共殺賊三百七十餘名
生擒首逆妻子兄弟及各賊目男婦大小二百八十六名
口滾巖跌死者二百餘名旋據探報三股合夥餘匪所賸
七八百人仍遁入油榨溝老山之內該處仍可通鮑家山

老林臣遂一面派令馬瑜富翰富僧德副將馬應國何君

佐參將馬文斌挑帶步兵飛行前往協力掃除臣現與賽

沖阿長齡溫春帶馬兵在於老林外之煙墩埡一帶扼截

總期就地辦淨勿留遺孽至此次所擒活賊男婦大小二

百八十六名口首級耳記共二百三十一副現均解到臣

營當將各犯研訊內有蒲添寶之胞弟蒲添朋蒲添寶之

妻王氏陳朝觀之次子陳宗恒之妻李氏先鋒井英之妻

何氏採馬旗手何三忠楊逢榜周茂盛熊廷貴等並據供

出殲斃少掌櫃陳宗顯卽陳朝觀之長子老教師冉文海

卽冉文儻胞兄爲先鋒冉啟才等三名當將蒲添朋並賊

目何三忠楊逢榜周茂盛熊定貴五名繩割其老賊並精壯戰手張明懷李正寬等一百九十二名一概正法其餘難民八十九名口給與路票回籍安業其逆妻蒲王氏陳李氏井何氏係應緣坐之犯送交隨營知府金之忠阿霖照例辦理此次打仗有四川藍翎外委王得勝一名陣亡應請

旨加恩賜卹至曾芝秀一犯臣留心查訪現無影嚮即使倖而漏網亦斷不能復行裏聚再查前次趕勦樊曾賊股有廣西右江鎮總兵德昌廣東提標中營參將德興湖北督標左營遊擊金洪翮所帶湖南廣東廣西三省兵丁內沿途因

雨水連絲自行徑回房縣者竟至二百餘名實出情理之外嗣經臣同長齡派令副將烏爾卿額前往查收又據烏爾卿額報稱收回官兵內有湖南兵丁毛清等八名廣東兵丁趙必陞等四名廣西兵丁劉坤等二名中途落後又復回房縣現已差弁查拏等情隨據解送到營臣查該兵丁等怙惡不悛竟敢復行脫逃實屬目無法紀訊據供稱係湖南兵丁毛清廣東兵丁趙必陞廣西兵丁劉坤三人起意脫逃郭朝先等十一名聽從同行訊明後臣卽傳集合營官兵剴切曉諭將起意之兵丁毛清趙必陞劉坤三名立卽正法並令懸首示衆其聽從之兵丁郭朝先等十

硃批甚是

珠批甚是

一名均用重枷枷號示衆俟軍務告竣再行發遣伊犁給額魯特爲奴至於該領兵員弁本應一併查參但念帶兵之員屢經更調其湖北征兵積疲已久實非起於近時現已嚴飭德昌等妥爲管束訓導儻再有故違卽行一併查參

諭曰蒲添寶與山內兩起賊匪合夥屯聚鮑家山恃險抗拒經色爾滾蒲尙佐開挖路徑乘夜率兵步行前進兵勇等俱攀藤附葛而行賊匪猝不及防登時紛亂官兵痛加殲戮連日共殺賊三百七十一名生擒首逆妻子兄弟各賊目男婦大小二百八十餘名滾巖跌死者二百餘名此次色爾滾蒲尙佐二人實可

謂不遺餘力但所殲獲尙非緊要賊目多係該逆等妻媳而首逆蒲添寶帶領所贗夥匪尙在奔逃德楞泰應卽催令色爾滾蒲尙佐乘此兵威勝勢益加龜勉速將該逆首夥悉數擒拏一俟此股辦完德楞泰卽將伊二人及此外出力將弁據實保奏候朕優加恩獎其因縋藤而下跌傷之滿漢兵勇數名實堪憐著德楞泰查明如僅係跌傷卽照例酌加賞賚儻因傷身故卽照陣亡例賜卹現在楚省賊匪爲數已屬無多况天氣漸次涼爽德楞泰應督率各路鎮將趕緊勦辦以期迅就肅清再膺懋賞所有此次陣亡之四川藍翎外委王得勝著咨部賜卹又據奏辦理逃兵一節所辦甚是至帶領三省官兵各員不能妥

爲管束實有應得之咎廣西總兵德昌廣東參將德興湖北遊擊金洪翮均交部嚴加議處

公又奏言竊臣欽奉六月初十日

上諭以臣冒雨趕勦淹斃極惡元兇樊人傑厥功甚偉晉封侯爵臣跪讀之下感激惶悚莫能名狀當卽免冠望

闕叩謝

天恩訖伏念臣蒙古世僕由健銳營前鋒出師回部金川石峯堡

臺灣廓爾喀苗疆等處質本駕駘材同樗櫟仰蒙

高宗純皇帝豢養造就

畀以軍旅重寄涓埃未報愆罪日多迺荷我

皇上矜全曲宥再邀

策勵頻年

錫類駢蕃

褒榮疊晉更叨

軫念戎行鼓勵無已益使軍心感奮勇氣倍興凡茲克捷制勝者

無非

睿謨訓誨並

鴻慈激揚所至

臣秉承

指示不過親厯行間相機調度本屬職分當爲之事况軍務至今

六載臣恭膺參贊未能迅速蕩平早紓

宵旰焦勞遲延負疚夙夜難安卽此次

臣

由巫山入楚其時探明

楚匪實在鴟張散漫應當以

國事爲重顧其大局是以據實

奏明過楚迨至東湖興山趕勦樊蒲兩大股賊衆已有萬餘
幸將士奮興效命得以疊加痛勦賊勢始行披靡蒲逆一
股現已所贗無幾而不及兩旬元兇樊人傑又伏冥誅全
股殲除淨盡均非臣意計所及此皆仰仗我

皇上威福山河效靈始克迅速若此於

臣

毫無寸長足錄且

臣前

荷

隆施授爲參贊

簡補成都將軍

特賜內大臣

御前侍衛

賞戴雙眼花翎

加恩晉至二等伯爵臣之子蘇崇阿復蒙

賞給頭等侍衛挑在

乾清門行走是臣父子仰沐

覆載陶成至優極渥

臣嘗念軍興以來三省中統兵大員惟臣一

人材質爲最下亦惟臣一人受

恩爲最重不但臣捐糜頂踵不足以酬報

珠批

是

珠批

優

臣

鴻慈臣世世子孫亦無以仰答

高厚迺以勦除樊逆之捷特蒙

溫綸再沛

加恩晉封三等侯爵復邀

上方珍賜聞

命自

天感悚無地至侯爵本爲臣下不世之遺逢實爲臣夢想所不到

惟念臣本屬單姓寒門當兵出身自揣福薄識淺受

恩已爲逾分况臣今年五十八歲雖齒落髮白而精力頗強尙堪

驅策卽大功告成臣報效於

德光身公年譜卷二十一
陛下之日正長一旦遽邀此

異數竊恐福折菑生反致有辜

聖德況樊逆屍身未獲曾逆生死不知軍務又未告竣臣尤不敢

承受用是不揣冒昧籲懇

天恩賞准收回

成命俾犬馬餘生得以常依

關下竭盡血誠圖報

主恩於萬一

諭曰德楞泰奏懇辭俟爵一摺此可不必軍營功罪視其人之自取朕初無所容心於其間朕於德楞泰素未識面因伊屢著勞

績疊加懋賞此乃酬庸懋典不爲逾分若有功可不受賞豈有
過者亦將不任罰乎德楞泰惟當倍加感奮止緊搜捕零匪如
能迅速嚴功肅清楚境更當承受厚賞儻心存自滿朕恩亦豈
可恃總宜勉益加勉慎之又慎誠不在目前退讓虛文也所有
懇辭俟爵之處著不准行

初八日

諭曰昨據額爾登保奏請展限一月於七月內勉力趕辦定將苟
逆設法擒獲又前勒保奏稱嚴飭鎮將等官限於七月內將川
省所有零匪一律肅清各等語俱已自定限期朕惟計日以待
大捷喜音之至至湖北一路雖未據德楞泰奏明何時可以辦

竣然伊初五日奏到之摺稱蒲逆一股已祇贗七八百人其餘
熊劉各逆及東湖竹谿零匪統計不過三千餘人是楚境逆氛
亦無難剋期掃蕩辦理教匪已逾六載又及半年爲時不可謂
不久朕初未嘗過事迫催令伊等難於措置現在陝省祇有苟
文明等在南山遁匿額爾登保已派應元寬楊芳等分路跟搜
伊與扎克塔爾楊遇春扼要策應該逆釜魚阱獸豈尙虞其奔
逃而川境久無成股之賊不過數十人數人零星潛匿更易搜
捕德楞泰到楚後連獲勝仗殲斃極惡首逆樊人傑曾芝秀等
軍威大振昨又將鮑家山攻破將蒲逆妻子兄弟生擒諒蒲井
等逆均已喪膽亡魂刻交秋令氣候涼爽雨水亦稀正當土飽

馬騰之時額爾登保勒保均當迅速辦竣以待自定七月之限
德楞泰一路早經得手計此旨到時已在七月中旬若能於月
內辦淨此朕所昕夕冀望者或因賊數稍多亦祇可遲至八月
萬難再緩也現距啟鑾之期不過旬日朕由熱河前往木蘭行
圍蒙古王公俱來瞻覲伊等亦知勦辦教匪一事將次蕡功並
因連年須馬甚多牧廠未能足額呈進馬匹充補缺數業經賞
收加以恩賚其時大功告竣捷報遙馳朕可就近宣示使該王
公等知數年軍務俱已完善蕡功自必同深慶忭朕定將額爾
登保等一例優賞帶礮策勳儻旣逾七月之限至八月尙不能
畢事又將遲至冬間以冰凝路滑爲詞成何事體朕亦無可曲

爲寬貸必將伊等嚴行治罪豈不前功盡棄耶勉之凜之朕言

不再

十五日

公奏言竊

臣於六月二十六日拜摺後督率大隊取道唐

家營東進探報賊衆由紫荆山東逃我兵正可遏其去路

又接據色爾滾蒲尙佐稟報該逆被兵尾追知紫荆山有

大兵迎截不敢東走連夜西折向黑山簸箕山奔逃該處

盡屬老林其徑直通鮑家山現已分帶步隊兵勇緊跟尾

追等語

臣查鮑家山西南北三面如獅子背寨灣頂塘六

塊石等處均係要路必須分派兵力截勦庶色爾滾蒲尙

佐尾追之兵方可得力卽令副將烏爾卿額等帶廣西湖
南步兵一千餘名赴獅子背西面堵禦並令於本隊內挑
出兵丁六百名交都司馬相胡宗興楊永順分帶就近由
九家泡寨灣拏卡堵禦又飛飭馬瑜副將馬應國何君佐
帶領步兵在六塊石截勦令富翰富僧德都當阿參將馬
文斌遊擊余陞等帶領滿漢步兵在頂塘一路截勦臣同

賽沖阿長齡溫春協領穆騰額明德等帶領馬隊在老林
外煙墩埡薄磨坪一帶扼截詎該逆等被色爾滾蒲尙佐
等追入鮑家山不能占踞於二十七日漏夜由原路西奔
適馬相等帶兵六百名至寨灣設卡之後二十八日天甫

黎明探報賊由原路竄出馬相胡宗典楊永順帶兵丁四百名前至筭箕凹地方直前迎勦斃賊二三十名賊勢稍退復用槍礮指定賊叢攻打賊拚命搶撲又斃二十餘名時正在力敵相持間忽然霧氣迷漫詎該匪分遣賊衆從溝底繞出官兵後路乘霧抄襲營卡守備鄭憲恩飭令牆子官兵槍箭齊放立斃賊匪三十餘名賊衆不避槍箭捨命直前衝撲奈兵力單弱營卡被其衝破守備鄭憲恩當被戕害賊復折回前後劫殺都司馬相胡宗典楊永順等腹背受敵均力戰陣亡適色爾滾蒲尙佐參將沈洪亦已尾追而來馬瑜探知賊由原路西逃帶兵從觀音河趕到

霧氣已散賊見兩路官兵追來不敢戀戰卽由寨灣向西飛奔我兵力追四十餘里沿途殺賊四五十名生擒張良友等二十七名訊無要供均係矛手一概正法餘匪翻後山坪向南面鍋盤山一帶遁去查此次分兵四路圍剿其寨灣地勢尤爲險要因湖南廣西兵力較弱是以臣派令赴彼據險拏卡堵禦滿擬將此股賊匪就地掃除不料該逆前後被勦情急無路逃生遂捨命衝撲以致官兵多有傷亡實堪痛恨查賊衆馬匹全無雖向南竄仍係老山箐林其勢必出彎腰樹上龕非圖入川卽欲竄陝除一面飛飭達勒精阿武隆阿並張績於川楚邊界上隨時確探迎

截並飭總兵孫清元德昌等於二竹一帶分探賊蹤截勦
外臣卽由北面之沿渡坪取道紫竹灣抄出彎腰樹一帶

緊顧北面總不令其竄陝設或入川可與川省兵勇夾擊
自更易於得手惟查鮑家山爲楚境第一險要之地因馬
隊無路可進故賊衆輾轉占踞希圖依險藉糧苟延殘喘
此番前後兩次將賊匪轟逼出山或再被其偷入盤踞不
但該處居民受其荼毒卽兵勇無法可以再進該處山勢
連亘四五百里直通彎腰樹九道梁東南通巴東興山又
與銀條嶺相思嶺毗連川界雖處處老山箐林無有如鮑
家山之陡險仄狹馬驟不能行者若我兵先將鮑家山占

據則賊匪無險可依卽向他處奔竄馬隊均能深入追勦

是以臣卽令副將烏爾卿額參將王占龍酌帶兵勇由寨

灣前進就近收集馬相等衝散之兵卽赴鮑家山扼據將

大小要路安設卡隘分兵嚴堵其採藥僻路雖已挖斷尙

須設法布置並調房縣典史蔣大錫一同赴彼曉諭各洞

寨聯絡壯丁協同官兵守禦既可捕搜零匪保全該處百

姓禾稼又可藉民力爲之協堵實爲兩便再臣接據孫清

元德昌稟報六月十八日探知竹谿之茅古坪並圓嶺大

山現有賊匪三百餘人分兵進剿副將朱士俸都司郭朝

鳴曾連鳳等由界嶺向茅古坪追擊德昌同總管託爾託

保侍衛特克昇額參將永祿遊擊烏勒喜訥都司韓綸韓英等由馬髮嶺截剿十九日朱士俸等趕至茅古坪賊據險抗拒朱士俸等率領兵勇仰攻槍擊箭射賊匪敗上山頂拋石如雨時德昌等帶兵由馬髮嶺抄來賊見兩路官兵兜剿登時奔逃官兵乘勢搶上跟蹤下壓由核桃園石坂溪趕至爛泥湖共殺賊四十餘名生擒活犯二十七名餘匪爬界嶺四散逃逸維時天色已暮未能深追訊據獲犯供稱賊首姓熊不知名字共有四百多人前在鐵爐溝被四川官兵打散如今祇有三百來人等語餘無要供均係矛手當卽正法其被擄難民卽照例省釋三十日復

據松柏寨民報稱有賊百餘名現在攻寨德昌卽帶兵前進詣賊匪一見官兵紛紛亂竄官兵窮追五十餘里殺賊十餘名逃出難民七名餘匪均入漆扒老林訊據獲犯賊有三百多人並不知賊首姓名現仍緊躡追捕等情查楚省惟蒲添寶夥聚賊匪現贖不過七八百人此外吉林泰勦辦東湖之賊卽係崔胡戴四夥匪不過四五百名李天林所勦歸州龔家橋賊股亦不過數百名臣均已嚴飭該鎮等趕緊勦除並飛飭孫清元德昌務將二竹一帶零匪搜捕淨盡臣現在惟有先將蒲逆股匪趕緊掃除以期次

第廓清楚境

諭曰蒲添寶所賸餘匪無幾德楞泰自應選派官兵將鮑家山險要地方嚴密防堵一面上緊勦辦肅清此股乃不能先事預防致賊匪得由原路竄出抄襲營卡皆德楞泰派委不善之咎該處地勢既屬險要廣西湖南兵丁素非趨健又未派令奮勇出力之鎮將赴彼帶領令賊復折回前後劫殺衝破卡座弁兵猝被傷亡此時若守備鄭憲恩都司馬相胡宗典楊永順等尙在自當嚴參治以失守卡隘之罪今旣力戰陣亡仍加恩著咨部賜卹現在德楞泰已令副將烏爾卿額等帶兵赴鮑家山扼踞堵禦卽嚴飭擇要密防不可再令賊匪盤踞

十八日

諭曰德楞泰督兵分路緊躡蒲逆是否已入川境近日辦理情形若何正爲懸念而頃接吳熊光奏東湖歸州境內又有賊六七百人在彼藏匿房縣屬之錦雞坪有零匪一股約二百餘人攻圍民寨寨首黨君彩力禦陣亡又竹山縣馬鹿坪等處有零匪二三百人先後竄至兵勇間有傷折看此情形自樊曾大股勦滅後各路將官兵勇未免疎懈大意以致賊匪又覺鳴張前據德楞泰奏賊勢窮蹙並無驃馬我兵馬隊易於追躡今該匪等復敢糾集夥黨攻圍民寨寨首旣亡勢必將寨內所有驃馬糧食搶掠一空又可助其勢力並恐山林僻遠被賊攻劫之地方尚不止此帶兵大員一時未能周知至戴四崔胡等股前經吉

林泰勦辦此時究在何處摺內稱竄至東歸一帶之賊有趙姓
徐姓爲首或樊曾餘黨或崔胡賊股均未可定此皆揣度之詞
並未得其確實姓名總之無論何股俱須勦盡設將來竄聚一
處復成大股辦理又形棘手德楞泰務須趁天氣涼爽之時督
率官兵上緊將蒲逆首夥迅卽殲擒移師房竹歸東一帶勦辦
零股並飭各路鎮將齊心戮力卽七月內不能一律肅清斷不
可逾八月之限勿得任賊蔓延並著每間六七日卽具奏一次
免使朕旰夕盼望所有陣亡之塞勇黨君彩二十餘人俱著咨

部賜卹

二十七日

公奏言竊

臣

前在扇子壩將蒲逆轟逼出山向西南狂奔

仍卽督兵由沿渡坪向紫竹灣一路抄赴彎腰樹遏其

北竄陝境之路派令色爾滾蒲尙佐由溫水河魏家溝緊

躡賊蹤初十日

臣

抵彎腰樹據報賊探離此不遠正與官

兵哨探相值一見卽行折回而逃等語其時賽沖阿長齡

溫春富翰馬瑜等帶領馬步兵勇飛馳趕勦

臣

督同富僧德都當阿副將馬應國參將馬文斌等繼進追至二十餘

里之桐木園地方趕上賊匪殺賊十餘名生擒曾省吾等

七名時色爾滾蒲尙佐等亦帶兵西來兩路兵勇趕殺賊

衆盡向南面翻天池埢老山亡命紛逃被步行兵勇追入

老林殺賊三四十名生擒周茂發等二十八名直追至廟嶺子餘匪又向陰裕河鑽入老林遁去色爾滾蒲尙佐等仍卽緊躡賊蹤臣同賽沖阿長齡溫春富翰富僧德都當阿馬瑜等由北面抄截旋探賊衆由陰裕河又向東南之大黃溪小黃溪有竄川楚界上廟堂河奔逃之勢該處一帶盡係老山箐林路徑險窄其勢似欲竄川又飛飭前派在大甯巫山邊界堵截之副都統達勒精阿武隆阿總兵張績等各帶兵勇隨時探迎截勦臣遂由老渡口順水溪緊顧北面惟自十一日起大雨如注日夜不止我兵冒雨前進十三日趕抵龍洞河因各溪泛漲匯流於此河寬水

深波浪洶湧次日砍伐樹木設法架搭浮橋人不能立足
日夜焦灼無可如何直至十五日半夜雨止十六日水漲
暫退數尺臣卽令趕搭浮橋挽渡十七日我兵均已齊抵

堆子場因恐川境達勒精阿武隆阿張續等或向他處追
剿賊匪無兵迎截遂令色爾滾蒲尙佐等帶兵由相思嶺

西北面遏截臣督兵直趨巴東之陳家坡顧其東折之路

現探蒲逆在巴東之天生橋地方又與白號張阮二姓賊
匪三四百人合夥共計千餘人必須就地掃除方可移兵
他往十五日又接據總兵吉林泰稟報六月二十七日探
得一股賊匪四五百人由馬良坪折竄浪蕩河東湖之黃

家場一帶當派鄉勇首領候補把總黃興隆把總黃成文
向元龍帶鄉勇二百名躡尾追勦該鎮帶馬步兵勇取道
新坪抄截二十九日趕抵新坪據黃興隆稟報二十八日
賊由新坪折轉至長嶺岡紮營勢甚散漫該把總等卽在
樹林內藏匿待至三更時乘其睡熟率領鄉勇圍住房屋
一所約有賊百餘人呐喊砍殺其餘各處匪衆自相驚潰
踐踏亦有燭傷者均向西而逃因黑夜兵單未敢窮追當
繳耳記六十八副活賊二十三名訊據活賊供稱此股賊
內是老黃號李老四同趙徐兩箇總兵聚有一三百人其
餘都是擄來的人等語當卽正法初一日正擬跟蹤前進

探報該逆有走白馬灘茅壩向歸州興山之勢已有總兵
李天林帶兵尾追而去該鎮以賊匪四五百人除擒殺渙
散外祇贖三百餘人既有李天林緊跟勦辦而南彰遠安
界上尚有賊匪三四百人應顧及東面爲要卽就近向霧
渡河北口荷花店一帶探蹤截勦各等情臣當卽批飭
令其趕緊勦辦又詢據巴東之太平寨寨長李興才稟稱
六月二十八日有麻守備帶兵在羅家溝將唐明萬一股
賊匪乘夜圍捕殺死二十餘人拏了四十多人七月初二
日夜間在柳樹灣又去把白號張家的賊匪殺了二十餘
人拏了三十多人搶得馬騾十四匹頭矛子很多初四日

起營押解向平陽霸去了等語

臣

查藍翎守備麻光裕係

施南府人該員所帶鄉勇數百名均係本籍佃戶隨征日

久極爲奮勇前經

臣

與吳熊光保陞都司時

臣

以各逆勦

殘零散見大兵卽逃遁無蹤是以令該員將所帶鄉勇改

裝執打賊旗並派

臣

營中雲南守備周允泰協同前往邊

界各老林內偏處搜捕茲據寨長等所供情形確鑿尚未

據麻光裕稟到諒亦因水漲所阻再查麻光裕所勦白號

張阮二姓之賊已與蒲逆合夥唐明萬一殷日久未得確

蹤至今祇有四百餘人賴大有熊二姓賊股此時亦祇五

六百人吉林泰所追南漳遼安之賊不過三四百名或係

崔胡戴四亦未可知李天林所追歸州之賊亦祇三四百
名是官兵近日各路分投截剿賊黨日漸渙散較前更爲
衰敗惟各逆自知滅亡在卽無不見兵卽逃日夜狂奔希
圖苟延殘喘臣惟有趁此秋令涼爽之際督飭各鎮將鼓
勵兵勇竭力分投趕辦以期迅速掃蕩廓清斷不敢以賊
衰稍爲鬆懈再臣欽奉

上諭以目下辦理軍務將次告竣酌籌善後事宜鄉勇一節最關
緊要令臣等將現在情形悉心酌議查鄉勇之設起自臺
灣嗣後湖南貴州及此次辦理教匪遂均有招募推原其
故緣逆匪起事人數本屬無多必以焚殺擄掠始可逼脅

良善之民而百姓畏其兇鋒相率從者日以千百計到處

烏合勢遂鴟張

臣

曾經出師臺灣該處一府三縣兩廳當

鳳山彰化失陷諸羅被圍除府城及淡水鹿仔港外其餘

百姓多爲賊匪逼脅入夥卽有百姓約聚鄰里壯丁自相

護衛殺賊者遂有義民之稱迨招撫舉行設法解散其中

並有子弟從賊而父兄爲義民者其意以兵勝則子弟有

所歸無非爲保全身家之計並非甘心從逆是以連次痛

勦後大兵所到之處相率投歸者絡繹不絕數月之間卽

廓清竣事湖南貴州苗民亦然至此次教匪不法其時英

善宜縣因賊氛猖獗到處蹂躪彼時寨洞稀少被難良民

多無容身之地勢恐去而從賊更爲失計且東鄉通江儀
隴巴州南江五州縣先後失陷民心驚惶莫措城守空虛
扼要卡隘均須兵力堵截故招募鄉勇令其設卡防禦既
安置難民不致從賊又可藉民力以資捍衛其有隨征鄉
勇不過道路熟諳協助軍聲實非仗之攻堅破敵是以元
二年間川省應募者卽有三十七萬之多故全川得以保
護陝楚兩省招撫者諒亦不少迨賊匪勦敗四散狂奔其
有兵力所不敷分顧之處如陝之漢江川之嘉陵江楚之
鄖西並三省邊界近山各屬賊股往來窺伺其城守卡隘
臺站實無許多散布之兵又不得不藉鄉勇以爲協護然

此皆就本地居民充當並非無業之徒故用之以禦賊匪者即使之自衛身家又可制其從賊之心其中雖有流民不過十之一二其隨征者藉本地之人爲之哨探嚮導故進剿抄截較爲便捷蓋鄉勇雖有勇敢之氣兵勝則助勢追殺若遇兇悍對敵非馬步勁旅直前攻搶或分路抄截不但不能取勝每致失機僨事皆因不諳紀律不知進止是以殊不可靠故勒保接辦軍務以來陸續裁汰已去三十五六萬偶有一二不法之徒該地方官隨時查拏臣與

勒保先後

奏明正法嚴辦至今帖然無事卽陝楚裁減者亦自不少此

歷年來臣之所經歷親閱情形也現在三省征防鄉勇如
經略額爾登保統率之楊遇春慶成扎克塔爾穆克登布
慶溥李應貴喜明及通判雒昂等各路隨征鄉勇六千九
百餘名此時諒又減少楚省如長齡統領之孫清元吉林
泰德昌李天林等各路現在隨征鄉勇四千六百名此內
有二竹房縣有業百姓二千五百名其無業者亦有二千
一百餘人川省如臣一路及勒保達勒精阿武隆阿達斯
呼爾岱薛大烈張績田朝貴參將桂涵遊擊羅思舉等各
路現在隨征鄉勇共五千五百餘名又建昌道劉清所帶
鄉勇並招撫投首報效者四五百名統計川陝楚隨征鄉

勇共有一萬七千數百名此係將來事竣均須安插辦理者至於叛產一項歷年來陸續投首並臨敵拏獲被脅未久難民遞回原籍者仍遵

旨賞還執照外所賸諒已有限斷不敷此項鄉勇之用其防江守城堵卡者三省約共不及二萬人概係本地有業百姓充當實與團練無異事竣後不過收繳器械並優給賞賚以次復業如楚省知府尹英圖管帶施南府鄉勇二千五百名因賊匪所賸無幾官兵足敷勦辦是以臣前與吳熊光商酌已奏請裁撤量加獎賞仍令尹英圖帶回本籍安置查三省防江守城堵卡各鄉勇俱係本處有業之民人故

情願入伍者少其隨征打仗者多係無業遊民到處爲家
以之入伍自是欣然樂從因查三省現添營制陝省甯陝
鎮增兵六千名尚有提標應增兵額楚省增兵三千五百
名川省亦增兵千名合計共增兵額一萬餘名其三省隨
征鄉勇內尚有有業可歸者約有十之二三無業者亦不
出一萬上下按照額兵之數足敷添補設或人浮於缺卽
可作爲新兵暫散於各營以束其身俟有額缺挨補如有
怠玩不遵約束者仍隨時零星裁革斷不致別滋事端或
其中亦有藝業不願入伍者聽其自便仍當優加賞賚遣
散回籍交地方官妥爲安插但陝省隨征鄉勇半係川省

游民卽楚省亦有川省數百人之本省各路隨征者六千餘名是川省人數實多而川省所添兵額不及一千此中

辦里稍費周章

臣

近接額爾登保來信俟苟逆辦竣卽移

師南來平利查平利二竹係三省適中之地斯時大局底

定不過分兵搜捕零匪

臣

與勒保惠齡吳熊光均可就近

會合先將鄉勇一項悉心籌計是否三省通融辦理抑或

另應設法之處總期遣散之後各得其所使其帖然甯謐

然後再撤官兵方爲萬全並可將善後一切應辦事宜一

併會商妥協至鄉勇中現有頂戴者應行分別或量材錄用或頂戴榮身及整頓營伍訓練額兵等事統俟會合時

逐一詳晰安議具

奏

諭曰蒲逆等匪尙延殘喘額爾登保辦完南山餘匪後自必帶領勝兵前來楚境幫同勦辦但德楞泰係屬參贊聲威素著入楚以後業將巨憝陸續殲除豈於此零星後起之賊尙待經略到彼始克奏績乎德楞泰此時或用勦撫兼施之法出示曉諭以教匪起事七年以來所有著名首逆俱經官兵以次斬擒卽如近日楚省首逆樊人傑曾芝秀王國賢等無不悉就誅夷皆爾等所知積年首惡祇賴苟文明一犯今又被經略督兵殲斃老教匪徒已無噍類現在川陝二省賊匪悉數掃除爾等伎倆斷

不能如老教之兇狡更難倖免偷生且俱係近來收拾敗殘後起之賊其滋擾地方之罪亦較之老教爲輕我皇上如天好生憐憫爾等愚頑誤投陷阱是以屢降恩旨凡有悔罪自新者概予寬宥爾等何苦執迷不悟甘蹈刑誅莫若及早回心多投出一人卽多活一人之命早投出一日卽早遂一日之生若經此次曉諭之後仍不自知改悔妄思免脫一經官兵擒捕卽當殲戮無遺萬無苟免之理生死所關急當猛省如此剝切曉諭賊匪等知有生理相率來投豈不較爲省事但此爲一時權宜一面出示一面仍當奮勇搜剿不可稍有鬆懈又另據覆奏安插鄉勇一摺所論皆是國家以兵衛民鄉勇名目原不應有自臺

灣用兵時始有招募鄉勇之事以後湖南貴州等處相率沿用至川陝楚三省剿捕邪匪愈用愈多視同額設殊不知臺灣初用鄉勇時數本無多易於遣散且該處一府三縣孤懸海外勢亦不能他往至此時鄉勇之數較前不啻倍蓰且係各省之人卽如本日德楞泰摺稱隨征鄉勇共有一萬七千餘名伊等數年以來習於戰鬪且隨官兵往來追賊熟習道路三省地方遼闊州縣毗連將來事竣之後若不妥爲安插任其分散可慮之處殆難勝言且各省地方民人有一家之內子弟從賊而父兄卽當鄉勇如川省鮮大川身爲首逆而前此殲斃該犯卽係伊同族之鮮文芳鮮文屏等伊等充當鄉勇之時乘官兵聲勢莫

敢報復迨事定歸鄉卽恐不免開仇殺之釁種種事端由此而起豈可不先事預籌全在地方官安置得宜相安無事昨據額爾登保等奏到籌辦鄉勇一事請分別情願入伍情願回籍及有業無業者酌量加恩散遣並派員護送設法將器械收繳等語已降旨詳悉諭知額爾登保等會同德楞泰及各督撫熟籌妥辦德楞泰摺內所云將情願入伍之人散於各營挨次補額此外不願入伍者聽其自便仍當優加賞賚等語與陝省所議相同自應如此辦理但回籍之後總必須責成地方官處置得宜留心撫馭始爲周妥至將來遣散之後各處鄉勇帖然甯謐然後再撤官兵此語甚是亦與朕節降諭旨符合又摺內稱川

省隨征鄉勇人數衆多而所添兵額不及一千辦理稍費周章將來分撥入伍時是否三省可以通融補額抑或另有設法之處並著與額爾登保及三省督撫悉心會商妥爲經理可也

八月初四日

公偕勒保奏言昨因蒲逆並熊翠等匪分竄川界臣德楞泰帶兵緊躡前來臣勒保當卽馳赴巫山一帶督兵堵截二十二日行至龍泉寺適總兵張績先已帶兵到彼據稱二十日探勦賊匪行至螞蝗口遇見探路賊匪數十人一見官兵卽折回原路逃竄張績督兵緊躡追勦至牯牛窖地方見後起賊匪在彼屯紮約有七八百人我兵分兩路

進勦參將桂涵遊擊門繼春都司傅廷標等帶兵由惠家塘席家溝一路抄截張績率同遊擊馬明德晉之連畢萬年由二臺子等處帶兵進攻斃賊二三十名生擒二十四名內訊出僞先鋒李仁道一名據供此股係青號餘黨熊翠熊方青爲首因湖北被官兵勦急要竄回四川不料遇著官兵迎勦把我們拏住等供張績當將該犯等正法其時餘匪由官坪山溪河竄回楚境張績正欲帶兵追勦又據探報蒲逆股匪八九百人已由八石坪一帶奔竄前來臣勒保卽督同該鎮在龍泉寺扼要堵截雜時蒲添寶股匪經臣德楞泰督兵在桐木園趕勦該逆竄至巴東天生

橋又與白號張阮二姓賊匪合夥向廟堂河西奔竄仍令

色爾滾蒲尙佐等帶兵由相思嶺向西北一路前進

臣德

楞泰同賽沖阿長齡溫春富僧德馬瑜等直趨巴東之陳

家坡觀音崖一帶兜截該逆因聞我兵分投趕追卽由阮

村板倉坪等處竄去探知川界龍泉寺有兵堵截復折回

後窖傍倚楚界老休奔逸

臣德楞泰等帶兵由陳家坡繞

向川楚交界之洋溪河一路兜截色爾滾蒲尙佐等跟蹤

追擊二十二日馳至馬塘地方趕上賊匪官兵奮力攻勦

殺賊四十五名生擒三十七名追至白果園又斃賊二十

餘名餘匪向小陰條嶺逃竄訊據獲賊張祿供稱我們蒲

元帥與黃號唐李兩姓餘匪合夥要想逃向四川去等供該犯等均係戰手概行正法其時臣德楞泰師次洋溪河與龍泉寺相距六十里臣勒保聞信馳往於二十四日會

合適據達勒精阿武隆阿等報稱該副都統等由花椒坪向通城一路探勦二十二日據報張公橋左手半山有賊屯聚達勒精阿武隆阿卽派副將鄭啟貴等分帶兵勇繞赴魚坪河遏截賊匪由大禾田竄川之路達勒精阿武隆阿等帶領馬步官兵由張公橋前進均於是夜五更發兵天甫黎明兩路官兵齊抵該處賊匪散處民房約有七八十人我兵一擁而進斃賊三十餘名生擒二十三名訊係

分出探路擄糧之賊其大夥匪衆現在梨子坪屯紮達勒
精阿武隆阿等卽帶兵馳往賊衆聞信挑出戰手三百多
人占踞梨子坪山梁抵敵達勒精阿武隆阿等親帶馬隊
由左手抄擊另派鄭啟貴張良槐馮元等分兵追剿賊匪
分股抗拒達勒精阿武隆阿等一路官兵抄上山梁槍箭
齊發殺賊一二十人匪衆不能抵敵始翻山奔潰官兵分
路追擊賊又分股由右手山溝遁逃鄭啟貴等帶兵截殺
又斃賊十餘名餘衆竄走野貓崖老林步隊兵勇跟追入
林見身穿紬衫賊首一人指令匪衆憑高拋擲石塊向下
壓擊正往相持間達勒精阿武隆阿趕到督率兵勇競進

有兵丁李正順鄉勇游貴爭先搶上將督戰之賊殺斃奪獲令字小紅旗二面餘匪卽紛紛奔走官兵乘勝分投趕勦先後共擒活賊一百二十九名奪獲賊旗槍矛甚多當令旗手劉復等指認所殺賊目據稱係襄陽白號爲元帥楊有貴等語達勒精阿武隆阿將該逆首級及活賊一併解送前來臣等會同查訊據該匪劉復供稱我們原係白號高三股內之人高三被拏僞元帥楊有貴帶了我們一百多人到老林內藏躲今年六月內有齊家營餘黨二百七八十人張家營二百多人合夥走到竹谿地方又遇蒲元帥一起他說德將軍官兵在湖北追殺得利害要想到

四川陝西各處老林躲避我們白號與齊家營的人在前
行走藍號蒲元帥的人在後相隔一天多路不料我們走
到梨子坪就被官兵打敗等供又訊出戰手楊明志等三

十六名卽與該匪劉復一併分別正法其餘被擄難民查

明遞籍安插又

臣德楞泰接據總兵李天林副將孫應奉

等稟稱探得有藍白各號零匪跟蹤追逐十七日追至萬

古寺前三四里之大石崖下見賊衆男女幼孩二三百人

已過河岸尙有鳩水渡河之賊一百餘人被官兵趕殺槍

箭齊發擊死及帶傷淹斃賊匪七八十人適仙女寨首屈

紹輝等見官兵於半渡掩殺亦率領團勇用槍礮擂石轟

擊又斃賊三十餘名探得該逆尙有三百餘人已翻山走
三間鄉一帶官兵擬由大峽渡河探蹤截剿又據總兵德
昌孫清元等稟報該鎮等在茅古坪一帶探剿據報有賊
百餘人在該境攻圍寨洞德昌孫清元等帶兵往捕賊匪
遙見官兵卽奔上圓嶺半山山上民房內又突出賊匪二
百餘人併力抗拒官兵一面極力仰攻一面分兵繞上山
梁橫截賊衆不能抵敵奔上圓嶺山頂我兵奮勇衝殺共
斃賊四十餘名生擒二十七名餘匪翻越界嶺四散逃逸
訊係藍白黃三號剿散之賊合夥男婦共有四百多人等
語德昌孫清元將所獲賊匪分別正法釋放現在臣德楞

泰同賽沖阿長齡溫春色爾滾馬瑜蒲尚佐等帶領官兵
仍趨楚境將蒲逆等股分投趕勦其熊翠熊方青一股餘
匪竄往巴東一帶急須派兵勦辦查有總兵吉林泰一路
官兵本在保康一帶勦辦戴四崔胡等賊茲該起賊匪已
經擊斃百餘名淹斃百餘名餘匪祇贗二百餘人竄走穀
城地界經吳熊光派委副將樊雄楚蔣觀濤帶兵接手勦
辦吉林泰已帶兵回抵興山與巴東相距較近臣德楞泰
卽飛飭吉林泰將熊逆股匪就近迅速辦理其二竹歸州
境內餘匪卽分飭德昌孫清元李天林上緊搜捕臣勒保
暫紮巫山地界如該逆被勦折回卽當督率張績等扼要

堵截以期迅速殲除及早嚴事

諭曰此次蒲逆等股經德楞泰等分投追趕向南奔竄因川界有兵督截又復折回楚境熊翠熊方青等匪亦經張績截回看來楚境竄匪處處遇有官兵攔截勢難遠竄其二竹歸州境內餘匪分飭德昌等上緊搜捕所辦俱是至令吉林泰就近帶兵專勦熊逆伊一路兵力無多恐不足以資搜捕儻稍予以暇迨德楞泰勦淨蒲逆而熊逆復攢聚多人辦理又稽時日目下勒保一路兵力有餘或於達勒精阿武隆阿等員內派一人酌帶官兵前赴巴東幫同吉林泰搜勦以期將該逆及早殲除其殺斃賊目之兵丁李正順鄭勇游貴應如何施恩之處著酌量保奏

同日公又奏言竊

臣欽奉

上諭內開德楞泰奏懇辭俟爵一摺著不准行等因欽此臣詭讀
之下仰見

聖慈訓誨策勵有加無已之至意謹望

闕叩頭謝

恩訖伏念

臣愚昧無知前蒙

恩命寵頒自揣福分淺薄未能承受是以不揣冒昧懾誠上瀆茲

荷

聖主逾格鴻施未收

成命並蒙

誥誠諄諄指示賞罰功罪權衡臣仰繹

綸言感悚無地惟有恪遵

聖訓勉益加勉懇仗我

皇上福威殲盡血誠迅速歲功藉以上承

天眷稍報

高厚於萬一

硃批一兩月內必得全數辦完且將蒲逆先除爲要勉之望之

十五日

公奏言據探報蒲逆等於梨子坪野貓屋被勦後又折回
龍王嶺白果園有走陰條嶺之勢因道路險窄馬不能進

當派參將沈洪遊擊曾壽虎正林挑帶奮勇步隊兵一千餘名緊跟賊蹤由小溪算盤石前進令色爾滾蒲尙佐等帶馬步兵勇繞至順水溪截其東竄令達勒精阿武隆阿取道張公橋梨子坪向南兜勦時勒保聞信亦督同張績由八石坪黃草坪後窖一帶向東北扼截臣恐勒保一路兵力稍單撥派副都統銜富翰富僧德等帶馬隊一百名前往協勦臣同賽沖阿長齡溫春馬瑜卽由通城東進緣此一帶均係川楚界上處處老山箐林路徑叢雜極爲陡險素爲各逆往來藏遁之藪似此兵分數路無論該逆竄出何處均有兵力隨時截勦詎該逆等知官兵四出兜勦

二十六日又由竹山之馬塘走羊坂出天池壩欲奔雙橋子時達勒精阿武隆阿兵抵梨子坪探知蒲逆等已由羊坂竄來卽於二更發兵由雙山包千里埢向南迎勦三更後大雨如注風霧交加行抵千里埢據報已有賊五六十人冒雨竄來當經前敵兵勇勦殺十餘名活擒四名餘匪折回而逃未便深追旋報大眾賊匪乘霧雨分股而來達勒精阿武隆阿隨令副將鄭啟貴在後占住山包接應兼顧後路達勒精阿帶領副將張良槐遊擊蕭太和都司楊正雄劉順等右迎武隆阿帶領參將馮元守備李朝相張國棟等左截賊匪約有一三百人拚死來撲被兩路兵勇

抄壓斃賊數名賊匪遂退向天池壩原路復又聚集六七百人蜂擁而來達勒精阿武隆阿等督兵正在抵敵忽聞後路喊聲大震報有賊匪由老林突出鄭啟貴督兵力敵達勒精阿武隆阿隨分帶兵勇接應適值賊匪撲至半山卽督率兵勇下壓槍箭齊發斃賊七八名帶傷者十餘名賊仍向老林遁去正追殺間復報右手賊匪繞上山梁達勒精阿等復帶兵勇齊力壓下斃賊十餘名生擒五名時愈昏黑風雨未息卽於該處紮住查得有索倫營長西靈阿右腿右手指各帶矛傷一處均不甚重隨營糧員候補吏目江淑於賊匪突出時猝被戕害兵勇內帶傷及陣亡

者共十餘名旋報賊匪乘夜向雙橋子遁去訊據獲犯藍號李文紀黃號張士友等九名供稱是藍黃白三號合夥係蒲添寶爲首有靳英苟大秀張揚袁中倫四箇總兵管事黃號唐明萬李姓白號總兵王紹賢都是被各路官兵打散的藏在興山巴東老山裏如今大家合夥要到四川去不料到處有兵攔堵纔連忙乘雨逃走我等被官兵拏住等語均係老賊一併正法嗣沈洪等亦自羊坂尾跟至沙包子一帶色爾滾蒲尙佐等接續亦抵梨子坪旋卽會合而進查該逆已向北竄其富翰富僧德臣仍卽調其回營二十九日探得該逆又由大小禾田走板蓬子翻鳳凰

嶺煙熾嶺一路三十日向木瓜園重陽灣前竄官兵飛馳追及其尾賊匪不敢抗拒惟捨命奔逃我兵追至木瓜園該逆鑽林越箐四散分逃各路兵勇入林搜剿共殺賊三四十名賊衆遂不走重陽灣繞竄黑水池大池溝密林馬步兵勇翻過兩重大山盡力窮追沿途又殺賊二十餘名生擒三十六名至竹谿之滾子坪賊衆於巖礎上恃險擲石抵禦色爾滾達勒精阿武隆阿蒲尙佐等將兵勇分爲中左右三路旁抄直衝並用礮位轟擊傷斃數人賊站立不住兵勇乘勢搶上又殺賊五六十名生擒二十八名賊遂紛紛敗走大恩堂時已昏黑訊據獲賊李明安等供稱

蒲添寶自己祇有四五百人一路合上藍白黃各號如今
共有一千四五百人都沒有馬驃不敢出山今被官兵各
處截殺聽他們大家商量說要到陝西平利紫陽去若北
面有兵就到歸州東湖一帶去他們說總向老山裏走馬
兵是難進來的等語訊出戰手李明安陳上賓等五十九
名當卽正法其餘新擄難民均予省釋探得該逆由大恩
堂關坪向東南雲霧溪有奔竹房之勢又探有一股賊匪
先由茅古坪竄向大恩堂雲霧溪是否與之合夥尙未得
有確實惟該逆疊次被兵截勦總未竄出老山臣仍飭沈
洪等帶步兵尾追令色爾滾蒲尙佐等帶馬步隊傍山探

蹕抄截

臣

同賽沖阿長齡溫春馬瑜等帶兵取道張公橋

長春霸由右手包住房縣之路本月初四日又據孫清元

德昌稟報七月初一日探得賴先鋒等一股賊匪在廟坪

攻圍三保天星各寨當卽商同副都統銜託爾託保侍衛

特克昇額營總武成額和隆武參將承祿等帶馬步兵由

四方寨一路迎剿孫清元帶兵由五虎塹追擊派副將朱

士奉等由橫擔山直趨三保寨衝壓初三日巳刻朱士奉

等趕抵該寨直前勦殺立斃賊三十餘名餘匪潰逃孫清

元帶兵至天星寨殺賊二十餘名圍寨之賊爬上後山半

坳有散逃廟坪河下者又被德昌之兵殲擒十餘名各路

齊上後山追勦由扁擔寨直至偏巖子又殺賊七十餘名逃出男婦難民六十八名口餘匪鑽入老林之爛泥湖牛角井初三日帶兵由柳樹槽牛角井大禾田追至大甯之後坪沿途復獲難民十餘名共計殺賊一百六十餘名生擒活犯五十九名難民八十四名搶獲刀矛旗幟馬騾無數訊據獲犯唐宗起供稱爲首係賴先鋒還有三箇頭人是姓熊姓沈姓王我原是線字號總兵六月裏纔到營裏他們共有七八百人由九湖坪紅茶園走到這廟坪地方想破那寨子擄些糧食牛馬不料官兵殺來被拏等語當將該犯同其餘戰手五十八名訊明分別正法難民等給

與銀米釋歸再頃據探報孫清元德昌現在帶兵在竹山之平頭河一帶是該鎮已扼據東北迎住賊頭卽平利邊界亦有穆克登布在彼堵截極爲嚴緊該逆斷不能北竄況有色爾滾蒲尙佐等尾躡緊追臣卽由江坪一帶旁抄

該逆夥聚四五股零匪亦不過一千四五百人雖是竄走匪亦當趕緊搜勦臣與長齡再四商酌長齡仍帶原兵前赴二竹一帶督同孫清元德昌趕勦零匪臣俟將蒲逆賊股辦完後擬赴歸東一帶督同吉林泰李天林趕緊搜捕

似此東北兩面督率分投趕辦於事較爲迅速惟查楚省

各路均派有東三省馬隊並無大員管帶未免呼應不靈
臣與長齡復商令副都統銜富翰前赴孫清元一路管帶
令副都統銜都當阿前赴德昌一路令副都統銜託爾託
保卽帶原管馬隊前往李天林一路協勦其吉林泰一路
容俟臣兵行就近再爲酌撥得力大員帶領又查現在各
股賊匪中有馬驥者甚少無不躲避官兵鑽林越箐然總
不離邊界老山之中達勒精阿武隆阿等本係大甯邊界
一路防堵之兵未便遠離臣現已撤出令其仍回徐家廟
一帶堵剿此次打仗帶傷並陣亡官兵十餘名另行咨部

辦理

諭曰此次蒲逆一股經德楞泰督率賽沖阿長齡溫春等並飭令
鎮將各路截擊沿途雖有斬獲爲數無多該匪等總在老山沿
邊一帶奔竄但合計亦不過一千四五百人又無馬驥奔逃不
能迅速現在官兵馬隊甚多以之追蹤步行散匪豈有不能趕
上之理德楞泰在楚勦辦爲時已久現當秋高氣爽若不趁賊
匪窮蹙徒步之時趕緊勦淨轉瞬秋成糧穀在地賊匪又得隨
處掠食搶奪民間驃馬資其飽飪甚或延至冬令又以冰雪沴
寒路徑澁滑爲詞何日始能蕪事耶本日又據吳熊光奏到探
報各路勦辦情形其大概與德楞泰所奏相同惟閻摺內所敍
情節楚省零股賊匪頗形散漫德楞泰一旅之師分投勦辦其

意以賊股稍多兵力不無分而見單欲請令額爾登保帶兵來
楚協勦所見尙是此事朕早已籌及節次降旨令額爾登保於
八月二十日左右帶兵由平利紫陽一帶赴楚此時諒已起程
不日即可到彼現在蒲添寶一股竟責成德楞泰一手專辦其
餘二竹歸巴等處零星股匪責成額爾登保督率搜勦總之辦
一賊首卽須將股內夥匪悉數殲除方無後患向來帶兵大員
往往將首逆殲擒未將夥黨勦淨以致逃散後又復糾合出擾
七年以來皆坐此弊卽如近日蒲添寶一股在鮑家山勦敗後
人數已屬無多迨由興房甯巫各處山內輾轉奔逃又與黃藍
白三號未經勦淨餘匪合夥賊數頓增此其明驗額爾登保德

楞泰旣各專責成務當鼓勵將弁追勦一股卽將此股零匪殲盡無餘尤當緊躡窮追不予以賊匪片刻之暇自不能別滋裏脅殺一賊卽少一賊庶可剋期蕪事以川楚陝現在情形而論川陝零匪日漸減少指日自就肅清而賊股聚於楚境經略參贊兩路大兵分投督勦大局總在楚省成功額爾登保德楞泰務須同心和衷不可不倍加奮勉此次被戕之隨營糧員候補吏目江淑著咨部賜卹

二十三日

公奏言據採報蒲逆等由雲霧溪竄屯於中蓬子杉樹凹銅錢埢一帶老林係馬力難進之路初一日蒲尙佐督同

副將馬元等帶步隊兵勇由馬鬚嶺火峰巖抄出杉樹凹進攻副將鄭啟貴張良槐等帶步隊兵勇由火神廟秋木梁繞赴銅錢埢截擊色爾滾達勒精阿武隆阿督同營總富登阿珠山等帶馬步兵勇取道中路大梁黃水池直搗中蓬子均於四鼓分路進發初三日辰刻色爾滾等先抵中蓬子賊衆遙見官兵遠來俱向榆皮扒老林逸去聚集戰手占住銅錢埢山梁依險抗拒馬步兵勇趕前奮力仰攻步步進逼斃賊三四十名生擒二十餘名賊遂順梁敗走我兵追至杉樹凹沿途又殺賊二十餘名忽有伏賊三四百人由林內突出拚死撲壓官兵悉力抵禦適蒲尚佐

等帶兵從旁抄擊而來該逆竟敢分投抗拒兵勇亦竭力
迎擊立斃賊四五十名生擒四十餘名匪衆卽潰敗遁入
老林時鄭啟貴由銅錢埢進兵亦斃賊二十餘名生擒十
餘名因山徑險窄密林叢雜復令步隊兵勇追至半山賊
衆復恃險推擲木石如雨官兵冒險上攻槍擊箭射斃賊
五六十名賊勢始形慌亂我兵乘虛搶上分投痛加勦殺
又斃賊四五十名生擒三十餘名餘匪丢棄刀矛亂竄由
右手遁逃搶獲賊旗刀矛甚多共擒賊匪一百十二名訊
出藍號大旗手汪其義白號探馬頭舒國黃號探馬頭任
廷爵田朋高藍號大頭領馮世哲五名並戰手王大有等

七十九名當卽分別斬割正法難民照例省釋旋探黃號賊匪二百餘人分走菌扒老林蒲逆股匪向散水河走瓦桑河北竄時德昌在葛藤口一帶臣卽飛飭令其星夜帶

臣

兵探勦黃號餘匪大兵仍分路抄截蒲逆並白號零匪初

三日德昌探得王家山左側菌扒一帶老林內果有賊匪

二百餘人屯聚當派遊擊馬濟盛等挑帶兵勇趕至該處

勦殺十餘名活擒六名德昌仍帶兵探蹤由唐家坪追勦

初五日探得該逆由岱坡屯於蔣池溝有上金頂山西竄

之勢德昌又令馬濟盛麻光裕周永泰鄒志賢等帶練勇

由左山梁下壓令羅綸唐盛高曾連鳳等帶兵先伏林內

德昌率同營總和隆武參將承祿都司韓瑛馬天益守備
胡光煥等帶兵勇順溝直進初六日卯刻周永泰等練勇
直上立斃賊匪二十餘名逆衆慌亂奔向老林竄逃被羅
綸等官兵自老林內突出又斃賊二十餘人時有餘匪二
十餘名順溝奔逃復被德昌和隆武等悉數殲除尚有零
匪五六十名鑽入老林當令兵勇分投搜捕有受傷後自
縊者十二名令前獲之黃士海逐一指認內有僞總兵李
洪浩大旗手嚴大受二人共計殺賊九十餘名擒獲男婦
賊匪六十八名口查訊獲犯內有僞總兵田大秀僞千總
唐宗裕逆妻唐肅氏三名並李洪浩嚴大受首級解送來

營其舒仲先等三十八名俱受重傷當卽正法難民二十

八名口訊明省釋現仍探蹤追勦等情

臣

覆查無異是日

色爾滾達勒精阿武隆阿蒲尙佐帶兵趕抵蔡家壩連日

沿途逃出難民多有來營請票及自行渙散者探得蒲逆

由泉河東逃有北折泉溪之勢色爾滾等分路抄截初七

日午刻兵抵泉溪知賊已於清晨竄過螞蝗坡遂盡力窮

追至陝楚交界之百人溝趕上賊尾該逆遂分出二百餘

人竄走南江河一股三百餘人向右手逃上大山時已昏

暮兵馬趕行不下二百里卽於該處露宿旋探過河之賊

屯於玉皇廟並無蒲逆在內其右手上山之賊屯於老林

內之瓦屋溝一面飛行知會穆克登布喜明一面令副將
鄭啟貴參將沈洪遊擊曾壽虎正林等帶原兵渡河追勦
又查得老山內瓦屋溝一帶馬力難施色爾滾達勒精阿
武隆阿蒲尙佐等商酌初八日四鼓督率兵勇均卽步行
前進時大霧迷漫未至山頂賊衆業已迎頭而來猝遇之
下竟敢捨死對敵我兵一擁競進刀砍矛戳立殺斃賊七
八十名生擒五十餘名餘匪奔上山梁紛紛散竄兵勇分
投趕勦又斃賊三四十名獲犯三十餘名是日分兵四出
搜捕至晚兵勇等又皆露處臣查該處老山周圍不下二
百里盡係密林崖礎易於躲藏遂令多分兵勇於山中徧

處細加搜查其山外各處隘口

臣同賽沖阿長齡溫春富

僧德富翰都富阿馬瑜督率各員弁各帶兵勇或數十名

或百數十名不等星羅棋布直至十二日先後共搜獲賊

匪一百五十二名訊據獲犯陳貴達等供稱蒲添寶一行

五人由右手走了又有三十多箇人由左手逃去副將馬

元卽帶兵從右手搜尋殺斃賊匪一名生擒劉思義張明

二名訊稱蒲添寶害怕得狠自己把辮子割了穿的紬子

衣服帽子矛子也都丢了他與一箇姓楊的往前頭走了

馬元旋於路上拾獲該逆辮子衣帽矛子等件卽令該犯

等認識均稱是實參將馬元向左手追賊殲斃七名生擒

臣

何居禮等十六名竄逃十三四名訊無蒲逆在內復飭逐處詳搜至副將鄭啟貴參將沈洪遊擊曾壽虎正林等帶兵追勦蒲逆分股之賊時賊匪過河北竄被喜明帶兵由牛頭店兜剿而來該逆折回正在渡河鄭啟貴等帶兵追到前後夾擊殺死淹斃賊匪數十名賊遂折向黃龍溝大梁老山而遁兩軍分追均有擒斬查蒲逆並未過河又聞穆克登布帶兵前來喜明等遂商酌接辦令鄭啟貴等撤兵回營十一日又據穆克登布喜明先後稟報接辦後分派將弁兵勇在老鴉絳茅坪繖子坪溜溪溝濫河腦各處堵勦殺賊數十人共擒活賊二十七名內有大旗手李

洪等訊據供稱祇有冉總兵在內男婦共有三百餘人除
殲擒並淹斃外祇贖百餘人大半婦女幼孩多係空手該
鎮等現與副將銜閻俊烈等分赴東西兩河搜捕十三日
藍翎把總張應鼎帶兵丁袁祥瑞張俸林顧榮張朝應等
四名在於瓦屋溝腦巖砌內搜獲賊匪龍茂蘭一名詢以
蒲添寶下落據該犯稱是日大家原趁著大霧下山跑到
那溝腦上祇見蒲元帥一箇人慌忙躲到那巖砌下
去這幾日也沒有出來我餓不過出來尋水喫等語當同
該犯前往指視係高巖三層惟中層更爲壁立樹木叢雜
卽聞腥臭之氣下有屍軀張應鼎等攀附而下至二層巖

上見巖半腰樹上有倒懸一屍無援可下張應鼎等遂各解裹腳搭包爲繩將張朝應縋至山腰見屍身倒掛於樹塹之上髮辮割去疑是首逆蒲添寶遂將首級割下並獲犯龍茂蘭一併解送前來

臣

查驗首級業已發變模糊難

辨惟髮辮割去外尚有五六寸長令爲該逆管理功勞簿之何居禮識認堅供眞確一面差弁赴馬元處查取拾獲辮子仍令前後陸續各獲犯指認僉稱蒲添寶面貌圓臉無鬚年約有三十歲額角兩邊無髮衆口如一驗俱相符將馬元所獲辮子驗明刀痕斜右係自割斷首級短辮相對色同而割痕亦合

臣

復恐不實偏加詢查適有竹谿縣

徐如灝押運糧餉到營稟稱途次盤獲藍號賊匪鄧孟朝
一名當詢蒲逆面貌形狀據稱習見該逆有左耳短小右

耳長大之異

臣復傳鄧孟朝令隨營文武各員查首級左

耳短小右耳長大實係迥別是此反覆辨認均稱的係正

身無疑所有藍翎把總張應鼎請卽以千總陞補其兵丁

袁祥瑞張俸林顧榮張朝應四名共賞銀一百兩以示鼓

勵查首逆蒲添寶與冉文儔同時起事連年稽誅餘燼復

熾茲被勦情急先自割去髮辮丟棄衣帽器械意圖免脫

值兵勇四出分投趕勦該逆迫不及遁遂藏匿下巖翼延

殘喘不料山巖高陡猝致跌斃倒懸掛樹可見該逆罪惡

貫盈無從倖免全股根株掃淨洵足以彰

國典而快人心查色爾滾蒲尙佐等自趕辦蒲逆以來不分
風雨晝夜督兵跟追總未予以稍暇迨同達勒精阿武隆
阿等協力追勦該逆輾轉於老山之中狂奔愈速色爾滾
蒲尙佐達勒精阿武隆阿等常川步行露宿此次兩日夜
趕勦三百餘里未令竄陥得以集事臣擬於經略額爾登
保送來

欽頒賞項內酌撥銀二千兩分賞達勒精阿色爾滾兩路滿漢兵
勇以示獎勵其餘出力員弁兵勇容俟查明另奏至於全
楚現在大局二竹一帶尙有零匪一二百人及數十人者

數起興巴歸東一帶有青黃兩號熊方青熊翠賊股六七百名鐵姓一股五六百名王國賢餘匪並崔胡戴四一股各有二三百名臣前奏商令長齡在於二竹督同孫清元德昌趕辦零匪今臣親厯二竹深入其境自應隨時通盤

籌計是以商酌令長齡帶同孫清元一路兵勇由房縣先赴東歸一帶督同吉林泰李天林等分投趕辦就近卽於房縣將陝省撤回兩湖官兵各百餘名歸併管領前進自東而西相機兜勦臣督同德昌現將二竹各零匪分投趕辦完竣仍令德昌帶兵在於二竹往來搜捕臣卽移師取道房縣之彎腰樹前赴興巴一帶自西而東隨時搜勦至

於達勒精阿武隆阿等前經

奏明令其回守大甯邊界嗣

臣

以蒲逆被追窮蹙逼近陝界

正在喫緊之際未便拘泥遽爾撤回是以仍令併力掃除

茲蒲逆大股及黃白號零匪均已勦殺殆盡此處相距雖

心嶺不過二百餘里

臣

卽令其帶領原兵就近仍回徐家

壩防堵再查陝省苟逆已除祇有餘匪三四百人竊計不

日即可廓清卽川省各零匪計亦不上千名自亦易於集

事至於楚省各股零匪較多約計不過二千餘人或山中

尚有藏匿零匪諒亦不過數起此際功虧一簣

臣

惟有鼓

勵兵勇趕緊搜剿以冀迅速與川省一律嚴功斷不敢稍

事稽延再此次打仗陣亡四川藍翎戰兵王世德一名兵
勇內受傷及陣亡者容俟另行咨部辦理再接據總兵吉
林泰稟報七月二十九日探有一股賊匪屯於歸州之水
田壩派都司張大勳帶兵勇由鹽水河前進吉林泰帶馬
隊官兵由螞蝗觀大路馳擊是日黎明微雨張大勳等行
抵水田壩見賊散屯民房卽率兵勇攻撲斃賊匪十餘名
賊衆慌亂四散奔逃追至大山大雨如注鳥槍不能施放
詎賊呼哨蜂聚乘勢下壓值吉林泰等督兵趕到奮力抵
禦向董家坪翻山而去因大雨泥滑未便窮追卽在該處
紮營詎該逆於三更時率衆偷撲參將楊安都司陳安信

等營盤官兵正在前營抵禦斃賊四十餘名不料賊匪詭
譎忽從後營衝撲楊安都司陳安信分帶官兵出營力敵
均各受傷幸各營分兵策應賊卽逃去陣亡並受傷弁兵
俟查明另報臣查該鎮所勦之賊卽係熊方青熊翠股匪
不過六七百人乃於黑夜偷撲營盤幸官兵力敵擊退現
已飭令隨時慎密並趕緊勦辦矣

諭曰蒲添寶一犯與冉文儔同時起事爲積年逋誅巨惡前經德
楞泰督兵追勦該逆復向老林四散奔逃異常狡猾並沿途裏
聚藍黃白等號零匪賊數增多經德楞泰分飭色爾滾蒲尙佐
達勒精阿武隆阿等緊躡賊蹤分路逼勦連日擒斬一千餘人

該逆隻身逃向崖礎藏匿復經官兵追逼該逆情急墮巖倒懸
巖樹身死實足大快人心皆由德楞泰調度得宜所致著先交
部從優議敘並賞給鑲玉帶頭玉四喜搬指玉翎管黃辯珊瑚
豆大小荷包德楞泰現係三等侯卽日大功告成俟捷音奏到
再當渥沛殊恩酬庸懋賞色爾滚達勒精阿武隆阿蒲尙佐等
督率兵勇步行前進盡力窮追俱屬奮勇可嘉均著挑在乾清
門行走仍交部議敘並各賞玉搬指大小荷包其餘在事出力
人員著德楞泰詳晰查明應如何分別陞賞之處開單保奏候
朕加恩茲發去小刀五把堪達罕搬指五箇磁搬指五箇著先
行賞給出力員弁又一兩重銀牌二百面五錢重銀牌二百面

著賞給此次出力兵丁以示獎勵其所請將藍翎把總張應鼎
以千總卽陞及兵丁袁祥瑞等四名賞銀之處均照所請分別
陞賞

恭錄

御製詩

參賛德楞泰奏報殲斃首逆蒲添寶全夥千餘名詩誌感
慰

三省餘邪二竹屯潛逃釜底臘遊魂窮搜巖穴蟆蝗掃碎首深

林皮骨存

據德楞泰奏報蒲添寶由雲霧溪竄屯於銅錢埡一
帶老林內德楞泰分派色爾凌等尋蹤追剿八月初一
三日官兵及賊於銅錢埡轉戰追殺共殲賊二百三四十名獲
賊汪其義等一百十二名從獲犯訊出黃藍白三號內旗手探

馬頭大頭領並戰手多名卽與正法尙有黃號餘賊二百餘人分走老林飛飭德昌探截於王家山左側趕殺活擒及自戕者一百五十餘名口令活賊黃士海指認出有僞總兵旗手僞千總賊屬數名口並供稱因蒲添寶在後黃號二百餘人先逃被勦等語蒲逆先由散水河一帶北竄經色爾凌等探得該逆有折向泉溪之勢盡力窮追賊分股奔逃由南江河竄去之賊派副將鄭啟貴等追勦適喜明等由北岸截回鄭啟貴等趕上夾擊均有斬獲其逃往瓦屋溝老林之賊因該處馬力難施色爾凌等於初八日四鼓步行上山截殺殲賊一百二十餘名搜獲生擒一百五十餘名屢於所獲緊要賊目內訊出蒲逆畏懼已極割去髮辮赤身逃匿惟細察蹤迹該逆無從出山逃遁前藍翎把總張應鼎等搜獲龍茂蘭一賊知該賊逃入滿腦巖山之下張應鼎卽帶該匪前往高巖指認尋見巖樹有倒懸一屍兵丁張朝應縱至山腰割取已無髮辮首級將龍茂蘭一併解送軍營令活賊等指認確鑿剝骨揚灰以申國憲蒲添寶積惡已久劫裹多人滋擾於房鄆二竹之間極爲兇狡今經德楞泰等盡力勦殺投巖伏殛且餘賊一千餘人殲戮殆盡賊目賊屬俱無漏網此外更無著名首逆其難民多人悉與安插計三省一書律肅清全臻甯謐羽馳奏指日可待矣

七載事成在九月萬民心定息羣言敬承

遺訓竭誠理感荷轉旋沐

昊恩

九月初三日

公奏言竊臣前將蒲添寶等大股首夥賊匪掃除商令長

齡先赴東湖歸州督剿零匪臣督率德昌等分兵往二竹

一帶搜捕緣二竹一帶均係老山箐林凡各股剿散零匪

往往一見大隊官兵卽四散遁藏不能得手必須另爲設

法搜捕或改裝易服或乘夜襲擊方能濟事當令副將馬

元守備高星文周志林曾大用等帶兵勇五百名由王家

山高平河一路前進令副將馬應國都司龍必達守備李

輝林陳偉等帶兵勇五百名由邊江河大西河一路前進
令參將沈洪守備黃廷相干總謝金章等帶兵勇五百名
由魚溪河一路前進令副都統銜富僧德副將何君佐參
將張應貴遊擊余陞沈虎等帶馬步兵勇八百名由白芨
埡一路前進均不裹帶鍋帳並不執打本營旗號改裝前
往設法搜捕臣同賽沖阿溫春色爾滾馬瑜蒲尙佐由葛
藤口司馬岡一路取道房縣之彎腰樹自北向西以爲各
路策應十九日據馬應國等稟稱探得古墳嶺一帶有零
匪二三十人在彼滋擾當卽帶兵勇前往搜捕該匪鑽入
老林適總兵德昌追勦賊匪六七十人亦遁入散水河老

林內兩路官兵會合於是夜二更時赴林內行走二十餘里約已四更見有板房一處賊俱睡熟羅倫麻光裕卽率兵勇前往圍住立斃賊三十六名生擒二十三名割獲耳記三十六副受傷兵勇數名訊係黃藍白三號餘匪並無頭目馬應國令龍必達等帶領兵勇亦於是夜趁月色在古墳嶺老林內搜捕殲斃賊匪十六名生擒劉大成等七名訊係白號餘匪祇有二十多人所有兩路獲犯均係積年戰手一概正法二十一日又據參將沈洪等稟稱探有餘匪四五十人在瓦桑河等處當帶兵勇假充賊匪前進該匪見其情形可疑正遊移間我兵卽向前擒捕立殺賊

二十一名生擒五名訊係黃號唐明萬餘匪俱係積年老賊當卽正法二十三日據富僧德何君佐等稟報探得小

溝鶯巖一帶有零匪三十餘人當卽帶兵勇趕追至碓窩溝深河寨殲斃賊匪二十九名訊係藍號蒲添寶餘匪臣

均隨時飭知該鎮將等令各竭力搜捕不可稍存草率了

事之見並令其直搜至川界仍回彎腰樹會合歸併兵力

向巴東興山自北而南進剿臣現在軍次官渡看來二竹

一帶不日即可肅清長齡於十三日分兵南行由房縣向

五臺一帶前進探有大小賊匪兩股約共有九百餘人小

股由珠藏洞東竄大股向保康之蔣口黃柏坪而逃長齡

現已趕赴黃柏坪與孫清元分兵相機抄截等情計長齡
一路緊跟賊蹤日內自己接仗至二竹此時將次肅清臣
現擬留德昌帶兵仍在二竹一帶往來搜捕臣督兵向巴

東興山進剿將崔胡戴熊各逆趕辦期與長齡等兩面夾
攻一俟額爾登保來楚彼此會合將楚境各零匪一律就
地掃除斷不令其竄陝亦不使之入川以冀三省全就廓
清迅速歲功仰慰

聖座再此次追勦蒲逆股匪總在老山箐林之中風雨寒冷兵勇
多係單衣跣足川省所製軍裝衣履尙未到營正在籌慮
茲候補知州竹山縣知縣范繼昌押運軍米來營見川省

兵勇在楚勦賊勞苦製辦棉襖一千件布鞋一千雙草鞋一千雙稟摺分賞兵勇臣當於

賞項內撥發價值又據范繼昌稟稱自願捐備情詞真切洵屬急公當令散給各兵勇甚爲得濟再臣前奉七月初五日

上諭令將蒲逆首夥悉數擒拏一俟此股辦完卽將色爾滾蒲尙佐二人及此外出力將弁據實保奏茲遵將色爾滾與達勒精阿等兩路實在出力之將領員弁兵勇內擇其超衆者公同詳慎遴選分別應陞應賞敬繕滿漢清單恭呈

御覽

諭曰德楞泰因楚省零匪一見大隊官兵卽四散遁藏隨飭將弁

等改裝潛往令賊匪不覺分投密捕俱有斬獲現在一二竹一帶
將次肅清德楞泰留德昌帶兵在彼往來搜捕伊先向巴東興
山勦辦崔胡戴熊各逆所辦甚是但前據勒保奏有楚匪千餘
人竄入大甯邊界何以此次德楞泰摺內未經提及此股賊匪
究竟係何股分出現在曾否折回其崔胡戴熊各逆賊數究有
若干著一併查明據實具奏將來奏報歲功後不得再稱尙有
零匪未淨藉詞延宕本日據額爾登保奏率同扎克塔爾格布
舍等帶領兵勇三千餘名赴楚自應從一二竹經過已降旨令其
將該處未淨餘匪順道搜捕德楞泰現往巴東進剿亦不必等
候額爾登保到彼致有耽延總當上緊將崔胡戴熊各逆奮力

截擊悉數殲擒一俟額爾登保到楚再將未淨餘匪協力掃除總須在楚境辦淨勿令其竄往川陝邊界復煩兵力務於九月內三省一體廓清嚴功完善用紅裏黃面之摺聯銜具奏宣示中外同膺懋賞不可延至冬令又以氣候寒冷雨雪載途爲詞則前功盡棄矣再八月二十九日德爾吉行圍德楞泰之子蘇崇阿射麅跪獻當卽賞給黃馬褂蘇崇阿甫經挑在乾清門不過循分當差因念德楞泰在軍營帶兵勤勞懋著是以加恩伊子德楞泰當倍加感奮朕昕夕盼望願汝速成大功永受厚恩以慰七年憂慮勉之至保奏出力各員已如所請分別加恩矣

十四日

公奏言竊臣前將分兵自東南向西北搜捕二竹零匪各路擒斬情形於八月二十四日具

奏後

臣

督率大隊自官渡河向西遏其東竄之路沿途逐日

仍分派兵勇徧行搜查並無藏匿之賊二十五日兵抵房縣之獅子巖吳熊光就近來營會商全楚零匪情形並應辦善後事宜再三商酌經略額爾登保前已奉

旨令其督兵入楚諒不日亦移師前來

臣

等同心協力將各股零

匪趕緊搜勦大局即可會同戡定其善後一切尚須熟爲

籌計者再當和衷商榷惟期事事妥善方無後慮刻下

臣

一面竭力搜捕多殺一賊卽去一害勦除一股卽少一累

于勦辦大局更爲妥速二十七日臣由仙家坪前進嗣據

副將馬應國都司龍必達守備李輝林陳偉等稟報自古
墳坪搜勦零匪後由黑溪溝馬鞍嶺黑溝至橫擔山老林

詢據逃出難民黃正昌稱有黃藍兩號零匪百餘人現在

雲霧溪說要走蒲溪河茅古坪過陝西去之語十八日該

員帶領兵勇扮作教匪趕勦申刻至蒲溪河追及其尾該

逆遙見認爲同教卽有二三十人前來會合迨賊匪近前

我兵刀矛並舉立殺賊十餘名生擒江學文等五名前賊

見兵勦殺不敢接應卽翻巖連夜奔逃官兵旋卽跟蹤前

追二十八日據副都統銜富僧德參將張應貴遊擊劉彪

余陞都司高發榮等稟報由佛洞溝龍坡嶺閻王鼻子牛
心寨黃木埢馬鹿坪孫家嶺沖天帳望天坪老木孔至木
耳溝有零賊三十餘人藏於溝底富僧德等將兵勇分爲
兩路前後截擊值賊匪正在房內喫飯兵勇突入殺賊十
八名生擒孫俸等七名訊據獲犯供係老白號餘匪並無
首逆頭目在內訊明俱係老賊當卽正法亦帶兵西追探
勦又據參將沈洪守備黃廷相干總謝金章稟報二十日
自竹山之老莊子東坡龍王包紅坪一帶探勦均無零匪
滋擾遂由乾龍洞羊耳埢自北而西探得水田坪南溪溝
現有一股賊匪屯聚人數頗多有向椒子園東南奔竄之

勢現在相機設法跟勦又據副將馬元守備高星文曾大
用周志林等稟報自老爺頂走招風巖烏雀埡馬鬟嶺二
十三日至蘭溪溝探得有川省截回一股賊匪七八百人
馬騾百餘匹已將該處天星小寨乘夜偷破尚未竄走馬
元等商酌於是夜三更帶兵勇由寨左山梁進攻黎明始
抵該處賊衆業已起營時早霧甚大卽乘勢趕追直至茅
坪山腳追上賊尾槍擊矛戳立殺賊三十餘名生擒米良
貴等十一名我兵追下溝底詎溝內霧氣全無賊見追兵
不多竟敢回頭抵敵幸兵勇保住山勢用鳥槍連環轟擊
並推拋亂石滾打相持兩時之久又斃賊十餘名賊卽敗

走當訊獲犯供係熊姓賊股原有七八百人在歸州被吉
大人官兵追到四川之巫山八石坪要走楊溪河撞著張
大人打敗折回湖北就翻銀條嶺走九湖出順水溪一帶
又有各號打散的聚有三百多人前來合夥如今共有一
千餘人大家商量要由大甯過四川去等語訊明當卽斬
訖遂撤回天星寨一面分投各路官兵會合併力截勦一
面設卡防禦是夜三更後該逆率衆復來搶撲卡座兵勇
預防整齊迨其逼近槍箭如雨斃賊三十餘名賊始敗退
兵勇乘勢出卡下壓擒獲袁維新等四名未敢遠追賊遂
連夜由扁擔庵走斑竹園龍市坪向西北奔逃各等情

臣

查該逆所竄之龍市坪與椒子園一路官兵不遠與富僧德馬應國等兩路官兵相距亦均在百里內外而沈洪等所稟水田坪南溪賊股卽馬元現剿之賊茲該逆又與北來各路零匪歸併一起正是極好機會可以聚而殲旃賊匪夥聚不過千餘人臣以分派各路兵勇究竟單薄不能痛勦是賊合而兵亦當合卽飭富僧德馬應國沈洪張應貴劉虎余陞等三路各帶兵勇與馬元等合力尾追進勦臣遂督兵取道清池壠嗣探該逆等於二十九日走應家溝南天門被馬元等追勦其尾殺賊十餘名搶獲馬二匹騾一頭賊衆遂翻山走長春壩梨子坪直向川境大甯之

雙橋子西逃先是臣恐各匪匪被官兵搜捕情急希圖入

川已預爲飭知防堵邊境之副都統達勒精阿武隆阿總

兵張績並飛函勒保督飭嚴堵在案該匪探知大甯徐家

壩一帶官兵防堵嚴緊不敢深入又北折竹溪南坪紅茶

園老林初一日屯於謝家坪其時各路官兵會合富僧德

馬元馬應國沈洪張應貴劉彪余陞等趕至紅茶園距賊

祇隔一重老林商酌乘夜帶兵出其不意破其賊巢先行

稟報等情臣查謝家坪係老林中開墾之處地勢稍爲平

坦有民房數十間北有山路一條可以竄出四川之蕭家

坡巴豆園直走雞心嶺若東竄卽係竹山之向家壩三層

河公祖河白河口其西南係臣與富僧德趕追之路斷不

敢折竄遂又飛飭達勒精阿武隆阿等帶兵卽由徐家壩

至蕭家坡探蹤堵截遏其雞心嶺之路臣卽督同賽沖阿

溫春色爾滾馬瑜蒲尙佐侍衛慶昌協領穆騰額明德總

管富登阿蘇清阿副將達自祥何君佐參將馬文斌王玉

龍遊擊王登魁汪湧等率輕騎各裹三日口糧不帶鍋帳

連夜兼程取道羅漢洞紅坪抄出天池埢白牛池白河口

截其東竄初三日晚臣已趕抵羅漢洞計行已有一百四

五十里時接富僧德馬應國馬元沈洪張應貴劉虎余陞

等稟報初二日三更時帶兵勇步行由紅茶園翻入老林

五更哨探賊衆半在謝家坪房屋住歇半在溝底支架窩棚均已睡熟毫無準備遂分兵兩路富僧德馬應國沈洪張應貴劉彪高發榮曾大用周志林瞿心能謝金章等帶兵勇由左邊上坡直下馬元余陞龍必達高星文陳偉黃廷相李輝林等帶兵勇由右邊山梁直下兩面夾攻將房屋三四十間四面圍住屋內賊匪甚多官兵卽齊聲呐喊併力殺進刀砍矛截逆衆於睡夢中驚起無不慌亂多有赤身奔逃者亦有持矛抵抗者官兵悉力殲戮立斃賊一百二十餘名生擒一百餘名搶獲馬騾七十餘匹刀矛旗幟衣物極多其有逃脫者復被兵勇分投趕殺又斃賊二

三十名生擒二十餘名時已黎明其溝底窩棚內之賊聞
官兵在謝家坪圍勦均不敢來接應盡皆亡命而逃又經
兵勇疾追翻越三重大山行走七八十里沿途又斃賊四
五十名生擒廖澤元等三十餘名直至謝家壩天晚殘匪
連夜東竄三層河擒獲老教僞帥張書漢熊翠之妻廖氏
逆子熊朝貴僞元帥廖澤元大旗手唐開緒殲斃僞總兵
葉星堂劉正福姜宗秀割獲耳記二百二十一副及獲犯
派員一併押解前來臣查賊匪由向家壩三層河東來必
走白河口若由天池埢白牛池正可兜頭迎勦臣遂漏夜
起營由紅坪翻過棗樹嶺天池埢白牛池四重大山初四

日申刻趕抵白河口該逆由二層河公祖河已過白河口
向漢川嶺竄走官兵追及其尾立斃賊五六十名生擒周
其昌等八十餘名河內又淹斃賊匪二三十名搶獲馬騾
十三匹頭旗五件刀矛五十三件再查訊各賊均供賊匪
內係熊翠與老教僞元帥張書漢二人爲首調度一切其
熊方青卽熊翠之叔素不管事張書漢與徐添德等同時
起事又屬兒女姻親通誅多日實爲巨惡臣查楚境現在
除熊翠熊方青餘匪五六百人外尙有戴四等一股賊匪
三四百人頃接吳熊光來信該逆由南漳竄至穀城邊界
被塞勇截擊西遁房縣之大木廠副都統銜託爾託保總

兵孫清元並副都統銜富翰副將呢瑪善分投兜剿又據竹山營遊擊沈彪竹山縣候補知州范繼昌稟報該逆已由化口向黨浴河汪家河奔逃該處東通鄖縣之唐家坪北通陝西白河縣之孔石河西通竹山之吉陽關已飛飭各要隘兵勇並寨勇協力堵截極爲嚴密即使該逆希圖入陝克登布喜明等扼據堵截極爲嚴密即使該逆希圖入陝自能前後夾擊況額爾登保此時諒已督兵南來正可迎
剿一鼓掃除或該逆折向南來臣就近探明亦可分兵剿辦至於總兵吉林泰李天林等所追熊姓賊股卽係臣現
剿之賊該逆由歸巴而入巫山之八石坪被川兵截回楚

境吉林泰李天林以賊旣竄川不便深入稟明前來查巴
東山內麻線坪一帶尙有不知姓名賊匪三四百名遁藏
於彼或係王國賢餘匪亦未可定臣卽飭該總兵等帶兵

順道勦辦現計全楚各起餘匪約共不過二千人此外卽
有百十爲羣數十結黨散藏山中者諒亦無幾但其中多
係各股漏網遊魂行蹤詭譎忽分忽合惟恃老林爲藏身
之窟臣仰體

皇仁每於臨陣令兵勇吶喊招撫偶有一二投出者多係難民其
老賊教匪從未見有投出之人又嘗多繕剴切告示更無
一人來投可見該逆等罪孽深重卽網開三面亦不能逃

現在搜捕獲難民無不訊明妥爲省釋斷不肯殘忍良善如遇老賊亦不敢姑息從事總期無枉無縱以副我

皇上除暴安民至意所有熊翠熊方青餘匪現賸祇有五百餘人

勢已狼狽由湖溪狂奔該處東北則出竹山之官渡西南

則係房縣之上龕九道梁彎腰樹該逆窮蹙斷不敢北走

勢必由彎腰樹南竄興山巴東一帶老林苟延殘喘臣商

令賽沖阿並派副都統銜富僧德總兵蒲尚佐帶前敵勁

旅馬步兵勇二千餘員名跟蹤緊躡令其不予以賊暇毋論

竄往何處窮其所向以期乘勢翦除淨盡臣督同溫春色

爾滾馬瑜等亦帶馬步兵勇二千餘員名繼進既可相機

抄截熊翠熊方青餘匪如戴四賊股南來亦可隨時迎勦其餘各起零匪仍當察看情形賊分則兵亦分賊聚則兵亦聚臨事權衡辦理俟額爾登保督兵前來兵威更加壯盛則分投徧搜諒此千餘零匪無難計日掃除大功即可戡定也計此次擒斬熊翠熊方青等敗聚賊股共殺賊二百九十餘名共擒活賊二百三十七名搶獲馬騾八十五匹頭大小旗四十七面火槍五桿刀矛三百五十六件訊出兩處生擒僞帥及大小頭目張書漢廖澤元等四名均行斬割其老賊及戰手周其昌等一百六十五名一概正法訊出被脅男婦難民王澤富李黃氏等七十五名口均

卽照例省釋其逆妻熊廖氏卽劉氏逆子熊朝貴卽楊三兒均係被擄逼脅亦均一併省釋遞回原籍

諭曰此次德楞泰探知熊姓賊匪自川省截回沿途竄合各號打散餘匪共有一千餘人德楞泰派令鎮將等分路抄截並督同賽沖阿等帶兵繼進乘賊匪黑夜住歇時兩路夾攻緊躡賊蹤奮力追擊殲擒賊匪五百餘名並生擒偽元帥及熊逆妻子大小頭目多名皆由德楞泰調度有方將士用命所致甚屬可嘉現在熊翠熊方青及戴四等股零匪統計不過二千人川陝邊界防堵俱極嚴密不能遠竄德楞泰統率各路官兵乘勝奮擊而額爾登保現已不日到楚以兩路大兵搜勦敗竄窮蹙之賊

自無難剋日掃除務於九月內將楚境零匪一律掃淨額爾登保德楞泰卽可與吳熊光聯銜由六百里加緊奏報大功戡定但必須楚匪實在淨盡不可稍有草率亦不必因朕萬壽慶辰在邇有心湊合儻熊翠熊方青戴四崔胡等逆內或有一二犯隻身竄匿而大局實已肅清該犯等本非著名極惡似此窮竄斷不虞其漏網則額爾登保德楞泰不必因犯未全獲稍稽捷奏卽熊翠等逆經官兵擒獲卽於該處正法祇須六百里馳奏其六百里加緊之報總於馳遞紅裏黃面奏摺時拜發至崔胡二逆本日德楞泰摺內未經敘明是否卽在戴四等股內遇便奏明又摺內稱招撫一事投出者多係難民其老教賊匪從未

見有一人來投等語可見該逆等罪惡貫盈難逃誅殛此時惟
有乘兵威勝勢搜捕無遺方爲正辦儻賊匪果有來營乞命者
原不妨予以一織生路卽熊翠等五逆內果能悔罪投出亦不
妨免其一死輕者安插原籍重者予以發遣亦無容出示招撫
也朕盼捷之心刻難等待然功虧一簣之時斷不可草率尤爲
最要又據額爾登保奏陝省官兵搜剿竄匪一摺其殺賊情形
與惠齡昨奏相同陝省零匪已有旨專交惠齡等督率搜捕額
爾登保惟當與德楞泰併力速辦楚匪爲要至伊摺內稱與德
楞泰協恭和衷而德楞泰摺內亦稱與額爾登保同心協力俱
用硃筆圈出伊二人同此公忠實堪嘉尙又據奏額爾登保移

師赴楚經過地方收成豐稔民居房舍俱已修葺整齊氣象恬
熙等語閱之殊深欣慰朕此次木蘭行圍風日晴和諸事順利
本日回蹕駐兩間房適德楞泰遞到捷報看此情形叢事喜音
自必剋期踵至著先賞給額爾登保白玉大吉葫蘆牌碧玉帶
鈞黃瓣松石豆珊瑚豆大小荷包賞給德楞泰白玉大吉葫蘆
牌白玉帶鈞黃瓣松石豆珊瑚豆大小荷包爲成功預兆統俟
大功全竣後再行渥沛殊恩同膺上賞又發去玉搬指十箇琺
瑯翎管五箇火鏢包五箇搬指套五箇文竹鼻煙壺五箇著德
楞泰查明賞給此次出力將弁又一兩重銀牌一百面五錢重
銀牌二百面著分賞出力兵勇以示獎勵

公又奏言竊臣與吳熊光會晤時接據長齡來信自保康
蔣口前進痔瘡復發兼得痢症力疾奔馳忽然吐血舊病
又發連日精神難支不能乘騎再四躊躇祇得就近於南
漳暫爲延醫診治當此勦賊喫緊之際若不據實直陳懇
爲代奏則是辜

恩莫大其所統領馬步兵勇暫交副都統銜富翰副將呢瑪善管
帶隨同託爾託保孫清元分投勦辦戴姓賊匪等情旋又
接據孫清元等稟報相同臣與吳熊光商酌長齡旣已患
病不能騎馬自應極爲醫治以冀速痊當卽札覆令其靜
心調攝並飭託爾託保孫清元富翰呢瑪善等妥爲管帶

協力趕辦奏入報

聞